

**Ўзбекистон Республикаси Судьялар олий кенгаши тизимида
коррупциявий хавф-хатарларни баҳолаш
УСЛУБИЁТИ**

1-боб. Умумий қоидалар

1. Ушбу Услубиёт Судьялар олий кенгаши (бундан буён матнда – Кенгаш деб юритилади) зиммасига юклатилган вазифа ва функцияларни бажаришда юзага келадиган коррупциявий хавф-хатарларни баҳолашга қўйиладиган талабларни белгилайди ҳамда Кенгашда коррупциявий хавф-хатарларни баҳолашда ягона ёндашувни яратишга қаратилган.

2. Кенгашда коррупциявий хавф-хатарларни баҳолашнинг мақсадлари қуйидагилардан иборат:

Кенгаш фаолиятини ҳар томонлама таҳлил қилиш йўли билан коррупциявий хавф-хатарга энг кўп дуч келадиган судьялар орасида коррупция ҳолатларининг олдини олиш ва уларни барвақт аниқлаш;

коррупциявий хавф-хатарларни минималлаштириш бўйича самарали профилактика чораларини ишлаб чиқиш.

3. Кенгашда коррупциявий хавф-хатарларни баҳолаш қуйидаги ҳужжатларни ишлаб чиқишни назарда тутди:

коррупциявий хавф-хатарлар харитаси;

Кенгашда коррупцияга қарши курашиш бўйича чоралар (тадбирлар), масъул шахслар, уларни амалга ошириш механизми ва муддатларни ўз ичига камраб оладиган коррупцияга қарши курашиш дастурлари;

коррупциявий хавф-хатар юқори бўлган лавозимлар рўйхати;

коррупцияга мойил бўлган муносабатлар электрон реестри.

4. Кенгашда коррупциявий хавф-хатарларни баҳолаш ҳар йили ёки мунтазам равишда, қуйидаги ҳолатларда амалга оширилади:

коррупциявий хавф-хатарларни дастлабки баҳолаш зарурияти келиб чиққанда;

конун ҳужжатлари талаблари ўзгарганда;

функция ва тартиб-таомилларни амалга оширишга жиддий таъсир

қиладиган тарзда суд органларининг ички ҳужжатлари ўзгарганда.

Ушбу Услубиётда қуйидаги асосий тушунчалар қўлланилади:

баҳолаш хулосаси – Кенгаш ходимининг ёки умуман Кенгашнинг субъектив қараши ёки фикри асосида бирон-бир факт ёки ҳодиса бўйича қарор;

функция – тартиб-таомиллар йиғиндисини ташкил этувчи Кенгаш фаолияти жараёнларидан бири (фаолият йўналиши);

ишчи гуруҳ – коррупциявий хавф-хатарларни баҳолаш учун тузиладиган ходимлар таркиби;

коррупцияга оид ҳуқуқбузарлик – коррупция белгиларига эга бўлган, содир этилганлиги учун қонун ҳужжатларида жавобгарлик назарда тутилган қилмиш;

коррупциявий ҳаракатлар – ходим томонидан пора берувчининг манфаатларини кўзлаб ҳаракат ёки ҳаракатсизлиги учун бевосита ёки билвосита, шахсан ёки учинчи шахслар орқали порани яъни пул, қимматбаҳо қоғозлар, бошқа мол-мулкни, мулкый тусдаги хизматларни, бошқа мулкый ҳуқуқларни олиш, талаб қилиш, таклиф қилиш, ваъда қилиш ва бериш, шунингдек, пора бериш ва (ёки) олишда воситачилик қилиш, расмиятчиликларни соддалаштириш учун тўловларни олиш, ходим томонидан пора олиш ёки ҳуқуққа хилоф бошқа мақсадларда ўз хизмат мавқеидан ноқонуний фойдаланиш;

коррупциявий хавф-хатар – шахснинг ўз мансаб ёки хизмат мавқеидан шахсий манфаатларини ёхуд ўзга шахсларнинг манфаатларини кўзлаб моддий ёки номоддий наф олиш мақсадида қонунга хилоф равишда мавжуд сабаб ва шароитларда коррупциявий хатти-ҳаракатларни содир этиш эҳтимоли;

коррупциявий хавф-хатарлар харитаси – Кенгаш фаолиятида амалга ошириладиган вазифа ва функциялар (жараёнлар) билан боғлиқ юзага келиши мумкин бўлган коррупциявий хавф-хатарнинг тавсифи ва даражаси, функцияларни (жараёнларни) тартибга солувчи механизмлар, функцияларни (жараёнларни) амалга оширишга масъул бўлган лавозим, коррупциявий хавф-хатарларни бартараф этиш чоралари, қолдиқ коррупциявий хавф-хатар даражаси, коррупциявий хавф-хатарни бартараф этиш чораларини амалга оширишга масъул ижрочиларни ўз ичига олган ҳужжат;

коррупциявий хавф-хатарларни баҳолаш – Кенгашнинг амалга ошириладиган функциялари (ваколатлари)ни таҳлил қилиш, уларга хос

коррупциявий хавф-хатарларни аниқлаш ва ушбу хавф-хатарлар даражасини баҳолаш бўйича фаолият;

қолдиқ хавф-хатар – аниқланган коррупциявий хавф-хатарни бартараф этиш юзасидан белгиланган чорадан кейин сақланиб қоладиган хавф-хатар;

тартиб-таомил – битта шахс томонидан бажарилиши асосида битта гуруҳга бирлаштирилиши мумкин бўлган ёки битта натижага йўналтирилган ёки маълум бир жараённинг ажралмас элементи бўлган кенгаш функцияларини амалга ошириш доирасидаги ҳаракатлар мажмуи;

хос хавф-хатар – Кенгаш фаолиятининг ўзига хос хусусияти ва чора-тадбирлар амалга оширилишини ҳисобга олмасдан бажарадиган функцияларига кўра хос бўлган, камайтиришга қаратилган хавф-хатар (яъни, мавжуд коррупцияга қарши сиёсатни, минималлаштириш ва жорий қилинган назорат чораларини ҳисобга олмасдан);

5. Коррупциявий хавф-хатарларни аниқлаш ва баҳолаш Кенгашнинг Судьялар дахлсизлигини таъминлаш ва коррупциянинг олдини олиш бўйича суд инспекцияси (бундан буён матнда Инспекция деб юритилади) ҳамда Кенгашда ташкил этиладиган ишчи гуруҳ томонидан амалга оширилади.

6. Инспекция коррупциявий хавф-хатарларини баҳолаш ва аниқланган хавф-хатарларни минималлаштириш бўйича чора-тадбирлар ишлаб чиқиш учун Кенгашнинг масъул бўлинмаси ҳисобланади.

2-боб. Коррупциявий хавф-хатарларни дастлабки баҳолаш

7. Кенгашда коррупциявий хавф-хатарларни дастлабки баҳолаш Кенгаш Раисининг топшириғи асосида амалга оширилади. Бунда унинг амалга оширилиши муддати белгиланилади.

8. Коррупциявий хавф-хатарларни дастлабки баҳолаш учун Кенгашда ишчи гуруҳ тузилади. Ишчи гуруҳ таркиби Инспекция билан келишилган ҳолда Кенгаш Раиси томонидан тасдиқланади.

Кенгаш ишчи гуруҳи таркибига коррупциявий хавф-хатарларни баҳолаш учун етарли билим ва тажрибага эга бўлган Кенгаш ходимлари киради.

9. Инспекция ишчи гуруҳ фаолиятини мувофиқлаштиради, Кенгашда коррупциявий хавф-хатарларни баҳолаш жараёнини кузатади ва мазкур Услугабийётда назарда тутилган тартибга риоя қилиши бўйича маслаҳат беради.

Коррупциявий хавф-хатарларни баҳолаш доирасида Инспекция куйидаги тартиб-таомилларни амалга оширади:

коррупциявий хавф-хатарлар харитасини умумлаштиради;

коррупциявий хавф-хатарлар харитасини Кенгаш раисига кўриб чиқиш учун киритади;

коррупциявий хавф-хатарлар харитасини Кенгаш аъзолари эътиборига етказиши;

коррупциявий хавф-хатарларни минималлаштириш бўйича чора-тадбирларнинг бажарилишини мувофиқлаштиради ва назорат қилади;

коррупциянинг келиб чиқишига олиб келадиган сабаб ва шароитларни бартараф этиш бўйича чора-тадбирларни амалга оширишга йўналтирилган таклифларни раҳбариятга киритади;

ишчи гуруҳ томонидан ишлаб чиқилган коррупцияга қарши курашиш бўйича чора-тадбирлар тўғрисидаги ҳужжатларни кўриб чиқиш натижалари бўйича уларни қабул қилишнинг мақсадга мувофиқлиги тўғрисида Кенгаш Раиси томонидан тасдиқланадиган хулоса тайёрлайди.

10. Коррупциявий хавф-хатарларни дастлабки баҳоланиши куйидаги босқичлардан иборат:

Ишчи гуруҳ Кенгаш томонидан амалга ошириладиган функциялар ва тартиб-таомилларнинг тавсифларини ишлаб чиқади ва тегишли тавсияларни коррупцияга қарши курашиш бўйича мувофиқлаштирувчи - Инспекцияга киритади;

Инспекция функциялар ва тартиб-таомиллар тавсифини таҳлил қилади ва ҳар бир амалга ошириладиган функция ва тартиб-таомилларнинг ушбу Услубиётнинг 4 ва 5-бобларида кўрсатиб ўтилган тартибда коррупциявий хавф- хатарларнинг даражасини белгилайди;

Ишчи гуруҳ ушбу Услубиётнинг 6-бобига мувофиқ коррупциявий хавф-хатарлар харитаси лойиҳасини ишлаб чиқади;

коррупциявий хавф-хатарнинг юқори ва ўрта даражаси берилганида коррупцияга қарши курашиш бўйича мувофиқлаштирувчи – Инспекция ишчи гуруҳ билан биргаликда баҳоловчи тартиб-таомилларни бажаришга масъул бўлган ходимнинг мажбурий иштирокида аниқланган коррупциявий хавф-хатарни минималлаштириш чоралари ишлаб чиқилладиган мажлисни ташкил қилади. Агар мажлис натижаларига кўра коррупцияга қарши курашиш бўйича мувофиқлаштирувчи – Инспекция ва Ишчи гуруҳ коррупциявий хавф-

хатарларни минималлаштириш бўйича чора-тадбирларнинг етарлилиги бўйича келишиб олмаган бўлса, ҳар иккала позиция коррупциявий хавф-хатарлар харитасида акс эттирилади ва Кенгаш Раисига кўриб чиқиш учун тақдим этилади.

11. Инспекция ва ишчи гуруҳ билан биргаликда ишлаб чиқилган коррупциявий хавф-хатарларнинг минималлаштириш чоралари коррупциявий хавф-хатарларнинг харитаси лойиҳасига киритилади.

12. Коррупциявий хавф-хатарларнинг харитаси лойиҳаси Инспекция томонидан Кенгаш Раисига, шунингдек Кенгаш аъзоларига кўриб чиқиш учун киритилади.

13. Кенгаш аъзолари томонидан коррупциявий хавф-хатарларнинг харитаси тўғри ва тўлиқ тўлдирилганлиги текширилади, коррупциявий хавф-хатарларни минималлаштириш бўйича ишлаб чиқилган чора-тадбирларнинг етарлилиги ва мақбуллигини ҳар бир тартиб-таомил кесимида таҳлил қилинади.

14. Коррупциявий хавф-хатарлар харитаси лойиҳасини кўриб чиқиш якуни бўйича Кенгаш аъзолари, агар эътирозлар ва саволлар бўлса, Коррупцияга қарши курашиш бўйича мувофиқлаштирувчи – Инспекцияга ва ишчи гуруҳга коррупциявий хавф-хатарлар харитасидаги эътирозларни бартараф этиш ва масалаларни аниқлаштириш тўғрисида сўров юборади.

15. Кенгаш аъзоларининг эътирозлари ва саволлари бўлмаган тақдирда, коррупциявий хавф-хатарлар харитаси Кенгаш раиси томонидан тасдиқлаш учун тайёр ҳисобланади, бу ҳақда Инспекция ва Ишчи гуруҳ хабардор қилинади.

16. Кенгаш Раиси коррупциявий хавф-хатарлар харитасини тасдиқлайди.

3-боб. Коррупциявий хавф-хатарларни навбатдаги тарзда (йиллик) баҳоланиши

17. Кенгашда коррупциявий хавф-хатарларни навбатдаги тарзда (йиллик) баҳолаш Кенгаш Раисининг топшириғи асосида ташкил этилади.

Кенгашда коррупциявий хавф-хатарларни баҳолаш ҳар йили 1 мартга қадар амалга оширилади.

18. Коррупциявий хавф-хатарларни навбатдаги тарзда (йиллик)

баҳолашни амалга оширишда, Инспекция ишчи гуруҳ кўмагида суд раисларига улар томонидан ўз қўл остидаги судьяларнинг функцияларини тавсифлайдиган қуйидаги маълумотларни аниқлаштириш учун мазкур Услубийтнинг 2-иловасига мувофиқ шаклда сўровнома юборадилар:

конунчиликда судьялар фаолиятини амалга оширишга таъсир кўрсатадиган бирон-бир ўзгаришлар мавжудми;

судьялар фаолиятида уларнинг шў касбий функцияларини бажаришига таъсир кўрсатган ёки таъсир қилиши мумкин бўлган бошқа ташқи таъсирлар содир бўлганми;

коррупциявий хавф-хатарлар охириги марта баҳоланганидан кейин Кенгаш тузилмасида, судьялар фаолиятини тартибга солувчи ички хужжатларда ўзгаришлар бўлганми;

коррупциявий хавф-хатарларни аввалги баҳолашда белгиланган коррупциявий хавф-хатарларни минималлаштириш бўйича чоралар амалга оширилганми.

19. Ишчи гуруҳ судьялар томонидан тўлдирилган сўровномаларни умумлаштиради ва маълумотни Инспекцияга киритади.

20. Ўзбекистон Республикаси Коррупцияга қарши курашиш агентлиги томонидан (бундан буён матнда Агентлик деб юритилади) давлат ташкилотларининг коррупциявий хавф-хатарларни баҳолаш ва бартараф этиш борасидаги фаолиятини такомиллаштириш, ушбу йўналишда камчиликларнинг олдини олиш бўйича кўрсатмалар берилиши мумкин.

Агентлик ва жамоатчилик томонидан берилган таклифлар асосида Инспекция Кенгашнинг коррупциявий хавф-хатарлар харитасини ва коррупцияга қарши курашиш бўйича дастур лойиҳасини такомиллаштиради.

21. Инспекция Кенгаш аъзолари ва судьялардан олинган маълумотларни минималлаштириш учун хавф-хатарларни дастлабки баҳолаш доирасида ишлаб чиқилган ёки амалга оширилган чора-тадбирларни ҳисобга олган ҳолда коррупциявий хавф-хатарларни навбатдаги тарзда баҳолашни амалга оширади.

**4-боб. Кенгаш аъзолари ва судьялар томонидан амалга
ошириладиган функцияларнинг коррупциявий хавф-хатарлари
даражасини баҳолаш услубийети**

22. Коррупциявий хавф-хатарларни баҳолашда Кенгаш аъзолари ва судьяларнинг ҳар бир функцияси ва тартиб-таомиллари коррупциявий ҳаракатларни содир этиш мумкинлиги жиҳатидан таҳлил қилиниши керак.

23. Функция ёки тартиб-таомилларнинг коррупциявий хавф-хатарлари даражасини баҳолаш қуйидаги босқичлардан иборат:

функциянинг коррупциявий хавф-хатари даражасини дастлабки баҳолаш;

Кенгаш ходимлари томонидан тегишли функция доирасида амалга ошириладиган алоҳида тартиб-таомилларнинг коррупциявий хавф-хатари даражасини баҳолаш.

24. Функциянинг коррупциявий хавф-хатарларини баҳолаш доирасида ҳар бир функция қуйидаги ўлчов асосида баҳоланади:

коррупциявий хавф-хатарларга энг кўп дуч келадиган функция; коррупциявий хавф-хатарларга энг кам дуч келадиган функция.

25. Чекланган ресурслардан оқилона фойдаланиш учун (инсон, моддий, техникавий ва молиявий) коррупциявий хавф-хатарларни баҳолаш навбат билан ўтказилиши мумкин, яъни коррупциявий хавф-хатарларни биринчи навбатда коррупциявий хавф-хатари юқорироқ бўлган функциялар бўйича баҳолаш керак.

26. Қуйидаги ҳолатларда коррупциявий хавф-хатар юқорироқ бўлиб ҳисобланади:

коррупциявий хатти-ҳаракатлар тўғрисида хабар бериш учун мўлжалланган алоқа каналлари орқали Кенгаш ёки суд тизими функциясига тегишли шикоят ёки хабарларнинг мавжудлиги;

Кенгаш ёки суд тизими функциясини амалга ошириш доирасида коррупциявий фактлар ёки шубҳалар, шу жумладан ижтимоий тармоқлардаги шарҳлар тўғрисидаги маълумотларнинг эълон қилиниши;

коррупциявий хавф-хатар юқорилиги тўғрисидаги қарор Инспекция ва ишчи гуруҳ томонидан юқорида кўрсатиб ўтилган мезонлар ва уларнинг эксперт хулосалари асосида қабул қилинади.

5-боб. Тартиб-таомилларнинг коррупциявий хавф-хатарларини баҳолаш услубиёти

27. Функцияларнинг коррупциявий хавф-хатарлари даражасини

баҳолаш натижаларига кўра, коррупцияга қарши курашишни мувофиқлаштирувчи – Инспекция ўрганилаётган функция доирасида амалга ошириладиган тартиб-таомилларнинг коррупциявий хавф-хатарларини баҳолайди, ҳар бир тартиб-таомил учун коррупциявий хавф-хатар даражасини қуйидаги ўлчовда белгилайди:

коррупциявий хавф-хатари юқорироқ бўлган тартиб-таомил;

коррупциявий хавф-хатари пастроқ бўлган тартиб-таомил.

28. Тартиб-таомилнинг коррупциявий хавф-хатари даражасини баҳолаш фақат коррупциявий хавф-хатари юқорироқ бўлган функциялар учун ўтказилади.

Агар Кенгашда етарли ресурслар мавжуд бўлса (масалан, энг кам иш ҳажмига эга бўлган ходимлар, молиявий, моддий ва техник ресурслар), коррупцияга қарши курашиш бўйича мувофиқлаштирувчи коррупциявий хавф-хатари пастроқ бўлган функцияларни бажариш билан боғлиқ тартиб-таомилларнинг коррупциявий хавф-хатарларини қўшимча равишда баҳолаши мумкин.

29. Қуйидаги ҳолларда тартиб-таомилнинг коррупциявий хавф-хатари юқорироқ деб ҳисобланади, агар:

тартиб-таомилни ижро этиш натижаси лицензиялар, рўйхатга олиш ҳужжатлари, бошқа турдаги ҳулосалар (шу жумладан, баҳолаш ҳулосалари), шунингдек қонун ҳужжатларида белгиланган ҳаракатларни келишиш ва тасдиқлаш (розилик билдириш) ҳисобланса;

тартиб-таомилни амалга ошириш доирасида фуқаролар ва (ёки) юридик шахслар билан бевосита шахсий муносабатларга киришилса;

субъектив параметрлар бўйича бир нечта номзодлар қиёсланса.

30. Агар тартиб-таомилни амалга ошириш доирасида ушбу Услугабийнинг 29-бандида кўрсатилган ҳолатлар билан тавсифланмаган бошқа чора-тадбирлар амалга оширилаётган бўлса, қуйидаги ҳолатларда тартиб-таомилнинг коррупциявий хавф-хатари юқорироқ ҳисобланади:

коррупциявий хатти-ҳаракатлари тўғрисида хабар бериш учун мўлжалланган алоқа каналлари орқали ушбу тартиб-таомилга нисбатан шикоят ёки хабарларнинг мавжудлиги;

ушбу тартиб-таомилнинг амалга ошириш доирасида коррупциявий фактлар ёки шубҳалар, шу жумладан ижтимоий тармоқлардаги шарҳлар тўғрисидаги маълумотларни эълон қилиниши;

коррупцияга қарши курашиш бўйича мувофиқлаштирувчи ва (ёки) инспекция ўзларининг эксперт сифатидаги фикри ва тажрибаси асосида тартиб-таомилнинг коррупциявий хавф-хатари юқорироқ деб ҳисобласа.

31. Ушбу Услугабийнинг 29 ва 30-бандларида назарда тутилмаган ҳолларда тартиб-таомилнинг коррупциявий хавф-хатари пастроқ ҳисобланади.

32. Функция ва тартиб-таомилнинг коррупциявий хавф-хатари даражасидан қатъи назар, кенгашда коррупцияга қарши курашиш бўйича мувофиқлаштирувчи коррупциявий хавф-хатарларнинг идоравий харитасига амалга ошириладиган функциялар ва тартиб-таомилларнинг тўлиқ рўйхатини қўшиши керак.

6-боб. Коррупциявий хавф-хатарларни аниқлаш ва баҳолаш услугабийи

33. Кенгашнинг функция ва тартиб-таомилларининг коррупциявий даражасини баҳолаш натижасига кўра ушбу Услугабийнинг 4 ва 5-бобларига мувофиқ коррупциявий хавф-хатарларни мувофиқлаштирувчи қуйидаги босқичларни ўз ичига оладиган коррупциявий хавф-хатарларнинг идоравий харитаси лойиҳасини ишлаб чиқади:

- коррупциявий хавф-хатарни аниқлаш;
- коррупциявий хавф-хатарни ўзига хос даражасини баҳолаш;
- коррупциявий хавф-хатарни камайтириш бўйича кўрилган чоралар ва жорий этилган назорат ва чора-тадбирлар тавсифи;
- коррупциявий хавф-хатарларнинг қолдиқ даражасини баҳолаш;
- коррупциявий хавф-хатарларнинг қолдиқ даражасини камайтириш бўйича чора-тадбирларни ишлаб чиқиш.

34. Коррупциявий хавф-хатарни аниқлаш фақат коррупциявий хавф-хатари юқорироқ бўлган тартиб-таомиллар учун амалга оширилади. Кенгашда етарли ресурслар мавжуд бўлганда, коррупцияга қарши курашиш бўйича мувофиқлаштирувчи коррупциявий хавф-хатари пастроқ бўлган тартиб-таомилни амалга ошириш натижасида келиб чиқадиган коррупциявий хавф-хатарни қўшимча равишда аниқлаши ва баҳолаши мумкин.

35. Коррупциявий хавф-хатарларни аниқлаш Кенгашнинг фаолиятидаги (вазифа ва функциялардаги) ташқи ва ички ахборот манбаларини таҳлил

қилиш асосида амалга оширилади.

36. Ички ахборот манбалари қуйидагилардан иборат:

Кенгашнинг (вазифа ва функцияларининг) ҳуқуқий асоси;

ички текширув материаллари, шу жумладан хизмат текшируви материаллари;

одоб-ахлоқ комиссияси мажлисларининг йиғилиш баённомалари;

ходимни коррупциявий ҳуқуқбузарликларни содир этишга ундаш тўғрисидаги хабарлар;

инспекция томонидан ўтказилган коррупцияга қарши курашиш ишларининг мониторинг натижалари ва бошқалар.

Ташқи ахборот манбалари қуйидагилардан иборат:

Кенгаш фаолияти соҳасидаги ҳуқуқбузарликлар тўғрисидаги мурожаатлар (хабарлар) ва статистик маълумотлар;

фуқаро ва юридик шахсларнинг коррупция ҳолатлари тўғрисида маълумот бериш учун алоқа каналларига, шу жумладан “ишонч телефони” ва Телеграм-каналга мурожаатлари;

ҳуқуқни муҳофаза қилиш органлари томонидан тақдим этилган материаллар, шу жумладан прокурор таъсир чоралари ҳужжатлари, жиноий ишлар бўйича материаллар ва бошқалар.

37. Кенгаш томонидан коррупцияга қарши ишларни мувофиқлаштиришда қуйидагиларни амалга оширишни ҳисобга олган ҳолда функция ва тартиб-таомилларни таҳлил қилиш асосида потенциал коррупциявий хавф-хатарларни (мумкин бўлган коррупция схемаларининг қисқача тавсифини тайёрлайди) аниқлайди:

ходим томонидан ва (ёки) яқин қариндошлари орқали пора олиш, шунингдек ходимнинг ўз ваколатларини қонунга хилоф равишда бажариши;

ўз вақтида қарор қабул қилмаслик ёки фавқулодда тартибда қарор қабул қилиш ёки жисмоний шахсга нисбатан мавжуд талабларни четлаб ўтиш;

ҳужжатлар, электрон маълумотлар базаларига била туриб ёлғон маълумотларнинг киритилиши;

хизмат ваколатларини амалга оширишда манфаатлар тўқнашуви;

расмий ваколатларни амалга оширишда фаворитизм, непотизм (таниш-билишчилик), маҳаллийчилик, ҳомийлик, уруғ-аймоқчилик каби ҳолатлар мавжудлиги.

38. Ҳар бир аниқланган коррупциявий хавф-хатар учун унинг ўзига хос

даражаси (коррупция хавфининг туғма даражаси) қуйидаги шкала бўйича баҳоланади:

юқори;

ўрта;

паст.

39. Коррупциявий хавф-хатарнинг хос даражаси коррупция учун хос бўлган хавф-хатар даражасини баҳолаш матричасига мувофиқ баҳоланади.

40. Қолдиқ коррупциявий хавф-хатар юқори даража билан тавсифланадиган функциялар ва тартиб-таомилларнинг кенгаш ходимларининг лавозими кўрсатилган ҳолда доираси белгиланади.

7-боб. Қолдиқ коррупциявий хавф-хатарларнинг даражасини камайтириш чоралари

41. Қолдиқ коррупциявий хавф-хатарни камайтирадиган чора-тадбирлар, назорат ва ҳаракатлар, қуйидагиларни ўз ичига олади:

кенгашнинг функциялари ва тартиб-таомилларини аниқ тартибга солиш; норматив-ҳуқуқий ҳужжатлар ҳамда ички идоравий ҳужжатлар лойиҳаларини ишлаб чиқиш;

инсон омилини қисқартириш ва кенгаш фаолиятини (вазифа ва функцияларини) рақамлаштириш, шаффофликни таъминлаш, жамоатчилик назоратини йўлга қўйиш;

42. Кенгаш ҳар йили 1-мартга қадар коррупциявий хавф-хатарлар харитаси ҳамда коррупцияга қарши курашиш бўйича дастурини тасдиқлайди.

8-боб. Якуний қоидалар

43. Заруратга кўра, кенгашнинг коррупциявий хавф-хатарлар харитаси ва коррупцияга қарши курашиш дастурига ўзгартириш ва қўшимчалар киритиш масалалари кенгаш раиси томонидан кўриб чиқилади.

44. Кенгашда коррупциявий хавф-хатарни минималлаштириш бўйича чора-тадбирларнинг бажарилишини назорат қилиш кенгаш инспекцияси томонидан амалга оширилади.